

Evening Dogri (NSD)

16-07-2025

खबरां

1. केंद्री मंत्रिमंडलै राईबाई दी पैदावार बधाने लेई धन धान्य कृषि योजना गी मंजूरी देई दित्ती ऐ। अंतरिक्ष जात्तरी शुभांशु शुक्ला दी अंतरिक्ष जात्तरा दी सराहना दा प्रस्ताव बी पास कीता।
2. इस म्हीने दी 21 तरीक गी शुरू होआ'रदे संसद दे बरसांती आहले इजलास कोला पैहले सरकारै ऐतवारें सब्भनें पार्टिणं दी बैठक् सद्दी।
3. गृह मंत्रालय नै पैहलगाम आतंकी हमले दी पछोक्कड़ै च जम्मू-कश्मीर लेई सी.आर.पी.एफ दियां 20 होर बटालियनां मंजूर कीतियां न।
4. एफ.ए.टी.एफ नै पाकिस्तान दी भूमिका गी उजागर करदे होई डिजिटल दौर च आतंकवाद लेई रपेआ पैहा उपलब्ध कराने दे बधदे खतरें बारै सौहगा कीता ऐ।
5. सी.बी.एस.ई नै बच्चें च सेहतमंद जीवन गी बढ़ावा देने लेई तेल बोर्ड बनाने दा निर्देश दित्ता ऐ।
6. बैडमिंटन च लक्ष्यसेना ते सात्विक साइराज चिराग शेट्टी दी जोड़ी जपान ओपन दे दुए दौर च पुज्जी गई ऐ।

<><><><><><>

Cabinet-Krishi

केंद्री मंत्रिमंडल नै राईबाई दी पैदावार बधाने आस्तै प्रधानमंत्री धन धान्य कृषि योजना गी मंजूरी दित्ती ऐ। नमीं दिल्ली च मंत्रिमंडल दी बैठक मगरा संवाददाताएं गी जानकारी दिंदे होई सूचना ते प्रसारण मंत्री अश्विनी वैष्णव होरें आखेआ जे इस योजना दे तैहत मुख्य च 100 जिलें दी ताल कीती जाग जेड़े त्रै प्रमुख संकेतकें घट्ट उत्पादकता जित्थे फसलें दी रड़ घट्ट हुंदी ऐ ते घट्ट दोहार

पर आधारित होडन। मंत्री होरें आखेआ जे इस स्कीम कन्नै मुलख दे 1 करोड़ 70 लक्ख करसानें गी मदद थहोग।

<><><><><><>

Cabinet-Shubanshu

केंद्री मंत्रिमंडल नै अंतरिक्ष जात्तरी सुभांशु शुक्ला दी अंतरिक्ष जात्तरा दी सराहना दा प्रस्ताव पास कीता ऐ। ग्रुप कैप्टन सुभांशु शुक्ला कल अपनी अंतरिक्ष जात्तरा पूरी करियै धरती पर पुजे न जेडे जे भारत दिएं बेशुमार आसें-मेदें ते आकांक्षाएं दा प्रतीक ऐ। नमी दिल्ली च अज्ज मंत्रिमंडल दी बैठक दे बाद संवाददाताएं गी जानकारी दिंदे होई सूचना ते प्रसारण मंत्री अश्विनी वैष्णव होरें आखेआ कि सुभांशु शुक्ला हुंदे अंतरिक्ष मिशन नै भारत गी अपना अंतरिक्ष स्टेशन बनाने दी दिशा च इक होर अगड़ी गै दस्सेआ। उनें आखेआ जे मंत्रिमंडल, भारती अंतरिक्ष अनुसंधान संगठन ते वैज्ञानिकें ते इंजीनियरें दी सराहना करदा ऐ जिंदे अनथक जत्तें कन्नै गै एहू उपलब्धि मुमकिन होई सकी ऐ। वैष्णव होरें आखेआ कि सुभांशु शुक्ला नै इस कामयाब मिशन राएं दुनिया च भारत दा मान बदाया ऐ।

<><><><><><>

Jandhan

सरकारै आखेआ ऐ जे राश्ट्रव्यापी माली समावेशन अभियान दे पैहले 2 हफ्ते अंदर गै 1 लक्ख 40 ज्हार जन धन खाते खोले गे न। केंद्री खजना मंत्रालय नै केई प्रमुख योजनाएं दी पुज्ज गी मजबूत बनाने लेई इस म्हीने दी पैहली तरीक सवां 3 म्हीने दा एहू अभियान शुरू कीता ऐ। एहदे च प्रधानमंत्री जन धन योजना, प्रधानमंत्री जीवन ज्योति योजना, प्रधानमंत्री सुरक्षा बीमा योजना ते अटल पेंशन योजना शामिल न। एहू अभियान सब्भनें ग्राम पंचैते ते शैहरी मकामी निकाएं च चलाया जा'रदा ऐ जेदे नै हर नागरिक इनें परिवर्तनकारी योजनाएं दा फैयदा ठोआई सकदा ऐ।

<><><><><><>

Govt. All Party Meet

संसद दा बरसांती आहला इजलास लाने थवां पैहले सरकारै ऐतवारें सर्वदलीय बैठक सद्दी ऐ। इस बैठक च सरकार संसद दे दौनें सदनें गी सुचारू ढंगै सिर चलाने आस्तै सब्भनें राजनीतिक दलें थवां सहयोग मंगोग। बरसांती आहला एह इजलास इस म्हीने दी 21 तरीक थवां अगले म्हीने दी 21 तरीक तगर चलौग। इस दौरान केई सारे महत्वपूर्ण विधायकें पर चर्चा ते उन्दे पारित होने दी मेद ऐ।

<><><><><><>

Congress

कांग्रेस अध्यक्ष मल्लिकार्जुन खड़गे ते विपक्ष दे नेता राहुल गांधी होरें प्रधानमंत्री नरेंद्र मोदी होरें गी चिट्ठी लिखिए अपील कीती ऐ जे औंदे मानसून सत्र च केंद्र शासित प्रदेश जम्मू-कश्मीर गी राज्य दा दर्जा देने लेई केंद्र विधेयक लेइए आवै। चिट्ठी च कांग्रेस पार्टी नै राज्य दा दर्जा बहाल करने लेई गलाया ऐ जे जम्मू-कश्मीर दे लोकें दे लोकतांत्रिक हकें दी राक्खी हिफाजत होई सकै ते लोकें दिएं आसें-तांगें गी पूरा कीता जाई सकै।

<><><><><><>

MHA-Battalions

केंद्री गृह मंत्रालय नै केंद्री रिजर्व पुलस बल सी.आर.पी.एफ गी जम्मू-कश्मीर च तैनाती आस्तै 20 ज्हार थवां मते जोआनें गी शामिल करदे होई 20 नमी बटालियन बनाने दी सैद्धांतिक मंजूरी देई दिती ऐ। आकाशवाणी दे जम्मू संवाददाता दी रिपोर्ट मूजब 22 अप्रैल गी पहलगाम च होए दे आतंकवादी हमले ते ओदे मगरा शुरू होए दे आपरेशन सिंदूर मगरा मंत्रालय नै 20 बटालियनें गी मंजूरी दिती। खजाना मंत्रालय आसेआ इस प्रस्ताव गी पैहले गै मंजूरी दिती गई ऐ ते केंद्री मंत्रिमंडल थवां बी तौले गै मंजूरी थोने दी मेद ऐ। नमियां बटालियनां जम्मू-कश्मीर दे हालात मूजब ते उन्नत परिचालन क्षमताएं कन्नै लैस होडन। एहदा मकसद कनून बवस्था ते आतंकवाद रोधी अभियानें च मुकामी पुलस दी सहायता करना, नाकें पर जांच ते होर दुए संवेदनशील इलाकें च तैनाती ऐ।

<><><><><><>

Budgam-Property Attach

आतंकवाद सरबन्धी ढांचे गी नष्ट करने दी दिशा च इक्क महत्वै आहली गैंऽ तैहत बडगाम पुलस नै पाकिस्तान आधारित आतंकवादिएं दे हैंडलर्स दी त्रै संपत्तिएं गी अटैच कीता ऐ। एहू संपत्तियां Khag, Chewa Beerwah ते Harwani Khansahab च न। एहू कार्रवाई खित्ते थवां आतंकवाद सरबन्धी ढांचे गी नष्ट करने दी दिशा च इक महत्वै आहली गैंऽ ऐ। पुलस अधिकारी नै गलाया जे इयै नेई कारवाइएं दा मकसद आतंकवाद गी थोने आहली माली ते होर दुई स्थूलतें गी खत्म करना ऐ। जम्मू-कश्मीर पुलस नै नेहू लोकें खलाफ सख्त कार्रवाई करने दी अपनी बचनबद्धता गी फी पक्का कीता।

<><><><><><>

Yatra-Fake News

श्री अमरनाथ जी दी जात्तरा रमानदारी आहले ढंगै सिर जारी ऐ। श्रद्धालु बिजन कुसै दिक्कत परेशानी दे बाबा बर्फानी दे दर्शन करा'रदे न। एहू गल्ल कश्मीर दे डिविजनल कमिशनर होरें उस्सलै आक्खी जिलसै सोशल मीडिया चैनल्स पर गलत खबर चला'रदी ही जे जाततरा गी स्थगित करी दित्ता गेआ ऐ। 15 जुलाई तगर 2 लक्ख 34 ज्हार थवां मते श्रद्धालु बाबा बर्फानी दे दर्शन करी चुके दे न। लोकें गी सलाह दिक्ती गई ऐ जे ओहू जात्तरा मुतल्लक कुसै बी जानकारी आस्तै आधिकारिक जानकारी पर गै भरोसा करना।

<><><><><><>

Trumps-Terrifs

अमरीका दे राष्ट्रपति डोनाल्ड ट्रम्प होरें इंडोनेशिया कन्नै इक नमे बपार समझौते दी घोशणा कीती ऐ। एहूदे तैहत अमरीकी कंपनिएं गी पूरी पुज्ज दे बदले इंडोनेशियाई समेयान पर प्रस्तावित शुल्क घटाइयै 19 प्रतिशत करी दित्ता गेआ ऐ। इंडोनेशिया एहूदे बदले च 15 अरब डालर दी अमरीकी उर्जा, 4 अरब 50 करोड़ डालर मुल्ल दा राईबाई सरबन्धी समेयान ते 50 बोइंग जेट जहाज खरीदग। इंडोनेशिया दे राष्ट्रपति प्रबोवो सुबियांतो होरें इसी आपसी फैयदें दा नमा जुग

करार दित्ता ऐ। इस्सै दौरान अमरीका नै अनुचित मुल्ल तैय करने दा हवाला दिंदे होई मैक्सिको दे टमाटरें पर 17 प्रतिशत शुल्क लाने दा ऐलान करी दित्ता ऐ।

<><><><><><>

India-UN

भारत नै संयुक्त राष्ट्र शांति रक्षकें खलाफ अपराधें पर सजा जकीनी बनाने दी मंग कीती ऐ। भारत नै आखेआ ऐ जे शांति रक्षा मिशनें दी कामयाबी लेई जवाबदेही तैय करना रणनीति दे लिहाज कन्नै बी जरूरी ऐ। संयुक्त राष्ट्र मित्र समूह दी इक उच्ची सतह दी बैठक गी संबोधित करदे होई भारत दे स्थाई प्रतिनिधि पी. हरीश होरें आखेआ कि शांति रक्षकें गी खतरनाक इलाकें च सेवा दिंदे होई गंभीर खतरे दा सामना करना पौंदा ऐ पर उन्दे खलाफ होने आहले ज्यादातर अपराधें लेई सजा पक्की नेई होई सकदी। उनें आखेआ जे जवाबदेही दी बवस्था नेई होने कारण अंतरराष्ट्री शांति प्रयासों गी नुकसान पुज्जदा ऐ।

<><><><><><>

UN Sec-Gen

संयुक्त राष्ट्र महासचिव एंतोनियो गुतरेस होरें दक्खनी सीरिया दे स्वेडा च जारी हिंसा पर गैहरी चिंता प्रगट कीती ऐ। उनें नागरिकें दी हत्या, साम्प्रदायिक तनोतनी ते निजी संपत्तिएं दी लुट सने सब्भनें चाल्ली दी हिंसा दी सख्त निंदेआ कीती ऐ ते सीरिया दे अधिकारिणें ते नेताएं अगगे नागरिकें दी रक्षा, शांति ब्हाली ते साम्प्रदायिक तनाव घट्ट करने दा आग्रह कीता ऐ।

<><><><><><>

FATF

आतंकवाद लेई रपेआ-पैहा उपलब्ध कराने आहलें पर तक्कर रखने आहली अंतरराष्ट्री संस्था एफ.ए.टी.एफ नै उनें खतरें गी उजागर कीता ऐ जित्थै तेजिया कन्नै डिजिटल होंदी जारदी दुनिया च पैहें दा गलत इस्तेमाल होंदा ऐ। एफ.ए.टी.एफ नै आखेआ ऐ जे पैहें दा गलत इस्तेमाल, आतंकवाद गी समर्थन देने, गलत तरीके नै कीती गेदी कमाई छपैलने जा विश्व शांति गी नुकसान

पुजाने आहली गतिविधिएं लेई कीता जाई सकदा ऐ। एफ.ए.टी.एफ नै जून ते जुलाई च छपी दिएं अपनिएं 2 रिपोर्टें च बी डिजिटल तरीकें राएं आतंकवाद लेई पैहा उपलब्ध कराने दा खतरा उजागर कीता ऐ। इस्सै दौरान भारत आसेआ पेश इक मामले दे जांच दरान दक्खन एशियाई क्षेत्र च पाकिस्तान दी सरकारी मिलकियत आहले राश्ट्री विकास परिसर थमां जारी होने आहलिएं प्रसार सरबन्धी चिंताएं गी बी एफ.ए.टी.एफ नै उजागर कीता ऐ जेदे च आखेआ गेदा ऐ जे प्रसार लेई पैहा मुहैया कराने लेई पाकिस्तान इस खेत्तर च मते खतरे आहला खेत्तर बने दा ऐ।

<><><><><><>

CBSE-Oil Boards

केंद्री माध्यमिक शिक्षा बोर्ड-सी.बी.एस.ई नै स्कूलें गी आखेआ ऐ जे विद्यार्थिं च नरोई जीवनशैली अपनाने बारै दिलचस्पी पैदा करने लेई तेल बोर्ड बनाए जान। सी.बी.एस.ई नै सभ्भनें स्कूलें गी चिट्ठी लिखियै आखेआ ऐ जे स्कूलें च शारीरिक कसरत ते सत्तदार खुराक बारै जागरूकता पैदा करने लेई कम्म कीता जा जेदे च खेड्ड गतिविधिं, पौष्टिक रूट्टी खाना ते सेही खुराक दे महत्वै बारै विद्यार्थिं गी जानकार बनाने कन्नोकन्नी उनेंगी इक नियमित जीवनशैली अपनाने पर बी जोर दित्ता गेआ ऐ। एहदे अलावा बच्चें गी पैदल दुरने, पौडियां चढने, लम्में चिरै तोड़ी बेइयै पढने दौरान बिच बिच्च उठियै हिलने-झुलने ते हल्की कसरत करने लेई प्रेरित करने लेई बी आखेआ गेआ ऐ। मोटापे सरबन्धी 2021 दी लैनसेट 2021 रिपोर्ट मूजब मोटापे दी श्रेणी च औने आहलें दी गिनतरी जेड़ी 18 करोड़ ही ओहू 2050 तोड़ी 45 करोड़ तगर जाई सकदी ऐ।

<><><><><><>

Tourism-Ministry

पर्यटन मंत्रालय दे महानिदेशक सुमन बिल्ला होरें लुप्त होआ रदी भारत दी पाककला गी संरक्षित करने दी आवश्यकता पर बल दित्ता ऐ। उनें आखेआ जे भारत दी पाककला सांस्कृतिक स्मृति ते क्षेत्रीय तकनीकें पर आधारित ऐ। नमी दिल्ली च राश्ट्री युवा शेफ प्रतियोगिता दा शुभारम्भ करदे होई श्री बिल्ला होरें आखेआ जे इनें परम्पराएं गी दोबारा संरक्षित करने दी लोढ ऐ। एन.वाई.सी.सी, भारती पाककला संघें दे महासंघ ते पर्यटन ते आतिथ्य कौशल परिशद दे सहयोग

कन्नै आयोजित कीती जारदी ऐ जेदा विशे ऐ “भारतीय पाककला विरासत दा उत्सव: परंपरा ते नवाचार दा सम्मिश्रण“। एहदे च पूरे भारत च क्षेत्रीय प्रतियोगितां आयोजित कीतियां जाडन जिंदा समापन औंदे बरे जनवरी च नमी दिल्ली च स्थित आई.एच.एम पूसा च इक्क बड्डे कन्नै होग।

<><><><><><>

Jharkhand-Nakslī

झारखंड च बोकारो जिले दे जागेश्वर बिहार थाना क्षेत्र च पौंदे काशी लुगु पर्वतमाला दे काशीटांड जंगल च पुलस ते नक्सलियें बश्कार टाकरा जारी ऐ। खबरें दस्सेआ ऐ जे दौनें बक्खी दा रूकी-रूकिए गोलीबारी जारी ऐ। इस टाकरे च कोबरा बटालियन दा इक जवान शहीद होई गेआ ऐ। सूत्रें दस्सेआ ऐ जे झारखंड दा इक कुख्यात नक्सली कुंर मांझी बी इस टाकरे च मारेआ गेआ ऐ जेदे पर 25 लक्ख रुपें दे इनाम दी घोशणा कीती गेदी ही। सुरक्षाबलें जिला पुलस, कोबरा बटालियन ते सी.आर.पी.एफ कन्नै मिलियै बड्डे पैमाने पर इक्क संयुक्त अभियान चलाए दा ऐ। सुरक्षाबलें नक्सलियें दी घेराबंदी कीती दी ऐ। आले-दोआले दे खेत्तरें च तपाशी अभियान गी बी तेज करी दिता गेदा ऐ।

<><><><><><>

Badminton

टोक्यो च जपान ओपन बैडमिंटन च सात्विक साइराज रंकीरेड्डी ते चिराग शेट्टी दी जोड़ी दक्षिण कोरिया दे कांग मिन ह्युक ते किम डोंग जू गी 21-18, 21-10 कन्नै हराइयै दूसरे तौर च पुज्जी गेई ऐ। पुरूष सिंगल्स च लक्ष्य सेन नै चीन दे वांग झेंग जिंग गी 21-11, 21-18 कन्नै हराइयै दूसरे दौर च जगह बनाई ऐ। तोआई, दो बार दी ओलंपिक पदक विजेता पी.वी सिंधु कोरिया दी सिम यू जिन थमां हारियै पैहले दौरे दे मुकाबले थमां बाहर होई गेई ऐ।

<><><><><><>

Weather

मौसम विभाग नै अगले 2 दिनें च देश दे पूर्वी हिस्सें ते मध्य भारत दे बड़े सारे हिस्सें च बड़ी भारी बरखा बरने दी पेशनगोई कीती ऐ। अगले 6 थमां 7 दिनें दरान केरल, कर्नाटक ते तमिलनाडु च बी बड़ी भारी बरखा दी मेद दस्सी गेदी ऐ। आकाशवाणी समाचार कन्नै गल्ल करदे होई मौसम विभाग दे वरिष्ठ वैज्ञानिक आर.के जेनामणी होरें दस्सेआ जे दिल्ली च बी अज्ज रातीं हल्की बरखा पेई सकदी ऐ।

मौसम विभाग नै पूरे जम्मू-कश्मीर च 16-17 जुलाई ते 21 थमां 23 जुलाई तगर भारी बरखा होने दे असार दस्से न जेदे करी विभाग नै बाढ़ ते ल्हास-पस्सियां पौने दे परामर्श बी जारी कीते न। इस परामर्श मूजब संवेदनशील क्षेत्रें च ल्हास-पस्सियां ते कुप्पड़ पेई सकदा ऐ। विभाग नै खास करियै प्हाड़ी इलाकें च कुप्पड़ पौने दी पेशनगोई कीती ऐ। नदियें, नालें च पानी दा स्तर बधने करी खल्के इलाकें च पानी भरोची सकदा ऐ। विभाग आसेआ लोकें गी इयै ज्जेय हालातें कोला बचने लेई चौकन्ने रौहने दी ते निर्देशें दा पालन करने दी सलाह दिती गेदी ऐ।

<><><><><><>

Women-Cricket

भारत नै इंग्लैंड दी महिला क्रिकेट टीमें बश्कार त्रै इक रोजा मैचें दी श्रृंखला दा पैहला मैच खेड्डेआ जा'रदा ऐ। भारती समें दे मताबक मैच साड्डे 5 बजे शुरू होआ ऐ। पैहले बल्लेबाजी करदे होई ... दी टीम नै हुनै कोला किश चिर पैहले .. ओवरें च .. विकटें दे नुकसान पर .. रन्ज बनाई लैते दे हे।

<><><><><><>